

بناديلك

لحنها وغناها الشيخ إمام

قد إيه بارتاح أنا
لحظة ما اقابل بسمتك
وبكون شديد
لما بامد الخطوه وامشى فـ سكتك
يا عشقى يا للى حبك اداى
وخذ منى السنين
ما بين الحلم والخطوه

وبين الكلمه والزنازين
أنا ماشى بناديلك
ما بلقاشى..
أغنيك

مشيت الليل
بطول الليل
لكين الليل ماوصلشى
واتارى الفجر فى عيونى
خيال..
والجرح ما دبلىشى
وشفت الناس
فقارى تموت على قوتها
وناس بتعلّى فى بيوتها

وناس راحت فدا صوتها

وناس خاینین

وناس تحت التراب نُوها

بتغزل فجر فوق نُوها

ومهما الغدر بینوها

أكید واصلین

وانا ..

یومی الی جای لسه ما خضرشی

وبکره بذره حتنبت مع الطالین

صلاة الزین

صلاة الزین علی ولادك

شداد جامدین

صلاة الزین

وضربه تطخ جلادك
تزيح الشين
يا ست الكل
يا عروسه
يا شابه يا للى كحل العين

بناديلك
أنا اللى فى العروق نيلك
ودمى زيت قناديلك
وانا العاشق فى قرآنك
أناجيلك
قوليلى فىن أنا جيلك
وانا جيلك
أوفى الدين

ونزرع شمسنا ضحكة
على شفة وليد أخضر
تدفي الأرض وتفتح زهور أكثر
وتيجي مصر تتمخطر
طهور الواد
ويبقى الكف متحنّي
وندعى الأهل ونغني
حباينا اللي بتهني
نرش الملح والسكر
وحصوه ف عين

سبتمبر ١٩٧٩